



A spera mas sosten pa proyecto di hotel na San Nicolas di KvK

Mientras KvK ta cuestiona e efecto di e proyecto aki

MINISTER Oduber durante conferencia di prensa ayera a indica cu e lo a spera mas agresividad di parti di Camara di Comercio (KvK) relaciona cu e proyecto di Bahia Principe Don Pablo Collection na San Nicolas. Esaki mirando cu ta trata di un proyecto cu, segun e Minister, lo crea un "ripple effect" pa economia di pariba di nos isla. KvK a indica cu nan tin sentimentonan mixto tocante un hotel di 1000 camber na San Nicolas y Minister ta cuestiona esaki. E Minister ta haya cu mester tin sosten pa cualkier desaroyo cu por yuda 'boost' e economia pariba di brug.

Segun Minister Oduber, el a spera pa hopi aña cu KvK lo a brasa un proyecto cu lo por trece un desaroyo pa San Nicolas. Pero tocante e plan comprensivo pa desaroya pariba di brug cu KvK mes a presenta na maart 2013, e Minister Oduber a bisa, "Mi no a wak nan yega cu e plan cerca Gobierno. Unico cos cu m'a scucha, cu nan tabatin tabata riba e area di e refineria." Un plan, de echo, cu Minister ta sostene. Esta, nan di parti di Gobierno, Minister Oduber a splica, ta sostene e plannan cu KvK a presenta pa e desaroyo di e tereno di refineria. Pero segun e Minister e no sa cu e plan di KvK ta contene un manera pa desaroya e.o. e centro di San Nicolas tambe.

Minister ta bisa cu e motibo cu no ta trahando agresivamente ariba desaroyo di e tereno di Valero, ta cu pa yega asina leu cu e tereno ta cla pa uzo pa p.e. comercio lo dura varios aña. Na prome luga, e tereno no ta ni di Gobierno, y esaki mes lo ta algo cu lo mester wordo negosha pa por cuminsa cana e caminda di desaroya e tereno aki. Di e otro banda, e proyecto di hotel ta algo cu lo por tin un efecto positivo hopi mas lihe pa e area di San Nicolas. Minister Oduber a spera cu KvK lo a mira con un proyecto manera esun di e hotel Bahia Principe lo por crea mas oportunidadnan pa su mesun miembronan, mirando e "spin-off effect" cu esaki lo por trece dene e area aki. Esta, e idea cu unabes e hotel ta estableci, naturalmente lo desaroya otro actividad economico den e area aki, manera p.e. companianan di watersport, companianan di huur auto, restaurantnan, etc. E Minister ta di opinion cu KvK lo mester "brasa" y sostene un proyecto na San

Nicolas, cu segun e lo ta di beneficio pa e miembronan di e mesun KvK. Otro punto cu Minister a menciona, ta cu segun e lo no tin necesidad pa importa trahado di afo pa por draai e hotel pariba di brug. Esaki tabata un di e puntanan cu KvK a menciona como un motibo cu nan tabatin sentimentonan mixto ariba e hotel na San Nicolas. Esta, cu pa bo tin un hotel di 1000 camber, probablemente lo mester importa 2000 trahado, for di cual mayoria lo gana un salario minimo. Esaki na su beurt lo nifica cu nan lo no yuda cu un contribucion halto na e fondonan social na Aruba. KvK a bisa mas trempan den siman cu cada persona cu ta gana un salario minimo ta hinca porta Afl. 100 den e fondonan social, pero ta gasta por lo menos Afl. 3500 pa persona di e fondonan aki. Y loke KvK a cuestiona ta si bin cu un proyecto di un hotel grandi na San Nicolas, cual por lo general lo crea hopi trabou cu ta paga un salario minimo, ta e miho desaroyo pa Aruba en general, y San Nicolas en particular.

Mas bien, KvK ta di opinion cu mester bay den direccion di crea otro tipo di empleo na Aruba. Empleo cu lo atrae hendenan cu estudio halto, y cu por paga un salario halto. Den un situacion asina, lo haya mas personanan cu ta yuda carga e peso di e fondonan social na Aruba. Leo Maduro di KvK a bisa cu e contribucionnan di un persona cu ta gana un salario den clase media ta cubri gastonan di 3 otro persona cu salario minimo. Segun KvK creacion di tipo di empleo cu ta paga salarionan halto lo ta un miho desaroyo pa Pais Aruba.

E efecto di bin cu un otro hotel di 1000 camber riba e situacion financiero di Gobierno, KvK ta pensa, lo no ta tanto positivo. Paso ta crea un situacion caminda Gobierno probablemente lo mester sigui subsidia hopi di e fondonan social cu tin na Aruba. Cual a lo largo ta e pueblo ta carga pa medio di impuestonan y premies. Esaki ta loke KvK no ta haya hustifica. Minister Oduber di su banda, ta pensa cu 'overall', e componente nobo den e economia di e hotel na San Nicolas, lo tin un efecto positivo pa Gobierno tambe. Segun e Minister, lo crea entrada pa Gobierno y e mes empleadonan di hotel lo por balansa e costonan pa cu e empleadonan cu ta gana un salario minimo.